

## SUL CYFFREDIN 29

ESEIA 65:17-25; SALM 98;  
2 THESALONIAID 3:6-13; LUC 21:5-19

---

---

### ● Gweddi agoriadol

Ar y diwrnod hwn o ddechreuadau newydd  
bydd di yn ganol i'n haddoli:  
y Tad sy'n ein caru,  
y Mab sy'n ein clywed,  
yr Ysbryd sydd ynom,  
yr undod rhyngom,  
y bywyd rydym yn ei fyw.

### ● Moliant

Ar ein taith gyda thi  
mae pen draw.  
Teithia rhai yn ysgafn,  
heb eu beichio  
gan lwythi bywyd,  
eu dwylo yn rhydd i wasanaethu  
a helpu ar y daith.  
Teithia rhai yn araf,  
wedi'u gorlwytho  
gan feichiau,  
ac angen rhyw help  
gyda'u llwyth.

Ac felly, yn deithwyr,  
cyfarfyddwn ar y ffordd,  
a chymryd, neu estyn llaw.  
Mae cyrchfan  
y teithiwn tuag ati –  
i' th bresenoldeb  
ble, gyda'r angylion,  
yr addolwn di bob dydd.

● **Cyffes**

Cadw ni yn agos yw'n gweddi.  
Bydd di yr un y trown ato  
pan wynebwn ofn,  
ansicrwydd,  
a chwestiynu.  
Bydd y graig y safwn arni,  
y gwirionedd y glynwn wrtho,  
a'r sicrwydd y pwyswn arno.  
Bydd y Tad y syrthiwn  
yn llawen i'w freichiau,  
y diogelwch yn ein teithio.  
Cadw ni yn agos yw'n gweddi.

● **Diolch**

Pan gerddwn gyda thi  
yng ngoleuni dy gariad,  
dy ogoniant di ddaw i'r golwg,  
nid yr eiddo ni.

Pan siaradwn amdanat  
gyda'r rheini a gyfarfyddwn,  
dy eiriau di sy'n siarad,  
nid yr eiddo ni.

Pan wasanaethwn  
bobl mewn angen,  
dy ddwylo di sy'n iacháu,  
nid yr eiddo ni.

Diolch i ti, Arglwydd Dduw,  
pan addolwn di  
a chyflwyno ein bywydau,  
caiff dy enw ei ogoneddu  
wastad.